
Mukaji

Awu

Izabela

kudi

Rév. William Marrion Branham

Mukaji Awu Izabela

DITANDISHA



Bwakabuulwibwa 2.20: “Kadi ndi ne ndambu wa maalu ândi mbengangana neebe, mbwalu udi witaba (ulekela) bwa mukaji awu Izabela, yêyê udi udyamba mudiye muprofeta mukaji, bwa kulongeshaye ne kuseeswishaye basadidi baanyi bwa kwendabo masandi, ne bwa kudyabo bintu bilambula mpingu.”

Mpindyewu ne mvense ewu ndi muswe bwa nupweke too ne ku mvense wa 23 bwa numone cijaadiki cya bulelela bunene kûndi anu ngenza kukokela ntema yenu kwine kwônsò aku. “Nenku Mêmê nênshipè bânà bende ne lufu; nenku ekeleeziya yônsò neimanye ne Mêmê ke udi ukenketa twonyi ne myoyi.” Ngâmbi mutanci wônsò ewu ne mu bushuwa bwa bwalu kudi ekeleeziya ibidi, nansha mudi Nyuma wakula naayi yônsò ibidi mu cikondo ne cikondo, byenze bu ne idi anu *umwepele*. S'mbaaba bambe patooke mwaba ewu ne idi ng'*ekeleeziya*, ne mbambe anu patooke ne imwe ya ku ekeleeziya ayi bwa pa kumona menemene kî mmimanye ne Yêyê ke Udi ukenketa twonyi ne myoyi TO. Yêyê ke wîkala mwa kubajaadikila ne bidi nanku awu. Nenku mpindyewu, ngekeleeziya kaayi ikala aba badi kabayi bamanye bulelela ebu? Mu bushuwa bwa bwalu mmusumba wa mvinyo wa mafi bwalu's beena kwitabuujja balelela mbamanye bushuwa ne dilumbulwisha didi dibangila ku nzubu wa Nzambi, ne bôbò bu mudibo baciina Nzambi, badi badilumbulwisha bôbò biine bwa kabalu kulumbulwishiibwa nansha.

Mpindyewu mbwa cinyi budi Nzambi ubiikidila ekeleeziya miine eyi ne ngekeleeziya Yende nansha mudiyi miikale mvinyo wa mafi? Bulelela bwa bwalu budi ne bôbò m'Beena Kilisto. Kadi kabeena Beena Kilisto baa

Nyuma nansha. M'Beena Kilisto baa musunya. Mbangate Dîna adi cyanaana. Maakò 7.7: "Ke bwa cinyi badi bankuukwila cyanaana, balongeshangana mikenji ya bantu bu malongesha." Kadi byôbî biine bôbò's m'Beena Kilisto, bwalu ncinyi cikwabo cidibo bafwanyine kwikala? Mwena Mahomet s'udi anu Mwena Mahomet. Aci's cidi anu wende ntendeleelu nansha mushindu kaayi wônsò udiye umulonda mu nsombelu ne bwalu mmuwitabe ku cidi Koran ulongesha bwa kantu ne kantu. Bya mwomumwe Mwena Kilisto pende udi anu Mwena Kilisto bu mudiye muwitabe ku cya ne Yesu udi Mwânà wa Nzambi, mulela kudi nsongakaji virgo, baakaMupoopela pa nkuruse ne wakafwa ne wakabiika ku lufu, ne Yêyè ke Musungidi wa bukwabantu, ne bikwabo. *(Bwa kwamba menene, mu Cikondo cya Laodikiya nekwikale aba badi badibiikila bôbò biine ne m'Beena Kilisto bwalu mbiitabe ku ngiikadilu milenga ya Yesu, piinaapu biikale badilaminjine bukenji bwa kubenga kwitaba Bunzambi Bwende. Beena Science Chrétienne's bakaadi bamane kwenza cyôci aci anu bu mudi misumba ne misumba ya badi bayiisha Evanjeeliyo wa Ditanta).* Yêyè awu's m'Mwena Kilisto wa dîna mwikale kabidi mwena ekeleeziya. Kadi kî mmwena kwitabuuja MULELELA ne wa Nyuma to. Mwena kwitabuuja wa mushindu awu ngukaadi mubatiijiibwe mu Mubidi wa Kilisto ne mwikale cidimba Cyende. Kadi nansha nanku mene, mu ndongamu wa Nzambi bidi ne lupela ludi ne cya kukola pamwe ne blé ne kabyena bikengela kulujuula nansha. Aci ke dîyî dituma dya Nzambi. Dituku dyalu dya kuswikiibwalu ne kwoshiibwalu dicilwala; kadi kî ndyanji kulwa to.

Pa nanku Nyuma udi wambila musumba wa bantu basambakane. Eku Yêyè wela kaalumbandi, eku Yêye udyula. Wamanyi kwamba cidi cîmpè kudi mwena kwitabuuja mulelela. Mpindyewu Udi udimwija wamba cidi mvinyo wa mafi ne cya kwenza padibi bikengela ne ashaale mubingishiibwe kumpala kwa Mukalenge.

MUKAJI AWU IZABELA

Mupostolo Yakobo mmutuleeje njila udi mpekaatu ulonda. Yakobo 1.14-15: “Kadi muntu yônsò ewu udi uteeciibwa padi dyalakana dyende yêyè mwine dimulalula, ne useeswishibwa. Pashiishe padi dyalakana diimita, didi dilela mpekaatu, ne mpekaatu padiye ukumbana, udi ulela lufu.” Mpindyewu aci ncmfwanyi menemene cya bidi munkaci mwa kwenzeka mu bikondo bya ekeleeziya. Bu mwakabanga mpekaatu kakuyi ku cîngà cintu to anu ku mmwenenu wa ku didyumvwila cyanaana dya bwalu edi, nenku lufu lwa ekeleeziya lwakabanga ne tuubyenzedi tukese tupeepele, twikale tumanyike bîmpè twa beena Nikalao. Byumuka ku byenzenzi e kuyabi ku dilongesha. Byumuka ku dilongesha ke byôbî kuupukila bukookeshi bwa mbulamataadi ne dibweja dya bumpangaanu. Mpindyewu mu eci cikondo bidi biya kudi muprofeta mukaji (mulongeshi) wabi mwine ne mu mushindu awu bitungunuka ne lwendu too ne mwayabi kasanganyiibwa mu dijiba dya kapyra, bwalu ke mwayabi menemene kashiikila, mu lufu lwibîdi.

Mpindyewu lubila lwa Nzambi mu kaabujima bwa kubenga cikondo ciinâyî eci ludi lusanganyiibwa mu dyela Dyende dya patooke dya muprofeta mukaji ewu, Izabela. Nenku bwa twêtù kuumvwa menemene cidiye umwelelela patooke mushindu awu, nebikengele bwa twêtù kukebulula mu maalu ende malonda mu Bible ne patwasangana cyakenzaye mu cikondo aci, netumanye cidi munkaci mwa kupitakana mu dîbà edi.

Cintu cya kumpala ne cya mushinga mukole menemene citudi tuyiila pa bidi bitangila Izabela ncyà ne yêyè kêna mwânà wa Abraham TO, anyi mene dibwejiibwa dyende dya mu bisamba bya Izaleela kadyena dyanyishiibwa bu dya nyuma bu muvwa dya Ruth mwena Moaba nansha. To, mukalenge. Mukaji ewu uvwa mwânà wa Ethbaal, Mfumu wa Sidona (Bakalenge wa Kumpala 16.31), uvwa mwikale mwakwidi wa Ashtarté. Yêyè ewu wakapeta nkwasà wa butumbi pa kushipaye mfumu uvwa mumudyanjidile, Peelesa. Pa nanku tudi tumona anu mwaba

awu ne mukaji ewu uvwa mwânà wa mushipyanganyi. (Eci cididituvulwija bushuwa anu Kaayina.) Ne mushindu wakashaalaye bu Mwena Izaleela kauvwa umwe wa ku mishindu ya nyuma ivwa Nzambi mutumine dîyî bwa dyanyishiibwa dya bantu baa Bisamba bya Bende to; kadi yêyê wakabwelamu ku DIBAKA ne Aakaba, mfumu wa bisamba dikumi ne bibidi bya Izaleele. Mpindyewu dibaka edi anu bu mutwâmònu kadivwa dya nyuma nansha; divwa dya cidiidi. Ne pa nanku mukaji mwine uvwa mutukine mu dikuukwila dya mpingu ewu kavwaku ne kaadijinga nansha kakesee kaa kushaala mukuukwidi wa Nzambi Umwepele Mulelela nansha, kadi yêyê wakalwa ne meeji a muntu mutuute milonda mu mabwe bwa kunyungulula Izaleela kuumumusha kudi Mukalenge. Mpindyewu Izaleela (bisamba dikumi ne bibidi abi) ukaavwa mudyanjile kumanya civwa dikuukwila dya twânà twa ngombe twa ngôlò, kadi too ne pa dîbà adi kabavwa anu badifile ku dikuukwila dya mpingu to, bwalu Nzambi nguvwabo anu bakuukwila ne mikenji ya Môsà nyivwabo biitabuuje ne ke milelela. Kadi kubangila dya cikondo cya dibaka dya Aakaba ne Izabela aci, dikuukwila anu mpingu kadi kuyadi kumpala mu mushindu wa lufu. Bivwa mmu cikondo cikaavwa mwine mukaji ewu mushaale mwakwidi mukaji mu ntempelo ivwaye mwibakishe bwa Ashtarté (Venus) ne Baala (nzambi-dîbà) mwakafika Izaleela mu cipidi cya njiwu cya nsombelu wende.

Biikale ne bwalu ebu mu mitu yetu, tudi mpindyewu mwa kubanga kumona cidid Nyuma wa Nzambi mwikale umanyisha patooke mu Cikondo eci cya Twatila. Ke cyôci eci.

Aakaba wakasela Izabela ne yêyê mwine wakacyenza cyenze bu budimu bwa mu cidiidi bwa kukolesha bukalenge bwende ne kubukuba ku njiwu. Ke cyôci aci menemene cyakenza ekeleeziya paakasediibwaye mu cikondo cya bukookeshi bwa Constantin. Bônso babidi kudisangabo pamwe bwa tubingila twa cidiidi, nansha mwakeelabo mmwenekelu wa nyuma mu bintu abi. Mpindyewu muntu nansha umwe kêna mwa kuntwishaku bwa ne Constantin uvwa Mwena Kilisto to.

Uvwa mumpangaanu mwikale muvwale cintu cifwanangane ne ciseba cya bwena Kilisto. Wakazola nkuruse mitooke pa ngabu ya basalaayi. Yêyê ke wâkabanga bulongolodi bwa bwânâ bwetu bwa badiswile bwa “Knights of Colombus.” Wakateeka nkuruse pa kaleyî kaa nzubu wa Mvidi Mukulu wa Sainte Sophie ke kubangila cilele aci anu mwaba awu.

Meeji a kusanga bantu bônso pamwe avwa ngaa Constantin, bampangaanu, Beena Kilisto baa dînâ ne Beena Kilisto balelela. Nenku bwa cikondo kampana byôbî kumweka bu bivwa bituuta dyakalenga bwalu beena kwitabuuja balelela baakalwa bwa kumona ne kuvwa mwa kwikala mushindu wa bôbô kupingaja aba bakaavwa baseesuke ku Dîyî. Paakamonabo ne kakuvwa mushindu wa bôbô kubapingaja mu bulelela, baakenzejiibwa bwa kukosolokabo ne musumba wa cidiidi awu. Ne paakenzabo aci, baakababiikila ne mbaabuludyanganyi ne kubangabo kubakengesha.

Anyishaayi ngâmbè anu mwaba ewu ne tudi ne cintu anu cyôci cimwecimwe aci munkaci mwa dyenzeka mpindyewu ewu. Bantu badi munkaci mwa kudisanga bônso. Badi munkaci mwa kufunda Bible wîkala mwa kusankisha muntu ne muntu, nansha yêyê Mwena Yuda, Mwena Katolike anyi Mwena Mishònyî. Badi ne cyabo Cisangilu cya Nicée kadi biikale bacibiikila bu Nsangilu wa Bisumbu bya ntendeleelu. Nenku nudi bamanye ne malongolodi ônsò aa adi alwisha nganyi? Adi alwisha Beena Mpenta balelela. Ncyêna nswa kwamba bulongolodi budibo babiikila ne Mpenta abu nansha. Mêmè ndi nswa kwamba aba badi Beena Mpenta bwalu mbôbô badi buujiibwe tente ne Nyuma Mwîmpè ne biikale ne bimanyinu ne mapâ munkaci mwabo bu mudibo benda mu bulelela.

Aakaba paakaselaye Izabela bwa tubungila twa cidiidi, wakapaana bwanaabute bwende. Paudi udyenza mwena bulongolodi kampana mpaudi upaana bwanaabute bwebe, wêwè mwaneetu wa balume, witabe anyi ubenge kwitaba cyôci aci. Musumba wônso wa cyena Mishònyî wakapatuka kadi

pashiishe kwalukila kabidi abo mbapaane bwanaabute bwabo, nenku paudi upaana bwanaabute bwebe, udi anu bu Esawu menemene – udi mwa kudila ne kunyingalala muwaswa mwônsò amu, kadi kabyakukwenzelaku bwalu nansha. Kudi cintu anu cimwepele cyûdî mwa kwenza ne nyôcî eci: “Patukaayi munda mwende, nwênù bantu baanyi, ne lekelaayi kwabanyangana nende mpekaatu yende!” Mpindyewu pawikala kuyi wela meeji ne cîndi ngamba eci ncyôcî, anji andamuna anu ku lukonko lumwepele elu. Muntu wetu udi ne mwoyi ewu udiku mwa kungambila ne ngekeleeziya kaayi anyi nnkwaka kaayi wa Nzambi ukaadiku mupete ditabuluja mwalukile paanyima paa yêyè mumane kubwela mu bulongolodi mukashaale dingumba? Bala mikanda yebe ya maalu malonda. Kwêna mwa kupetaku nansha umwe to – nansha umwepele mwine.

Divwa dîbà mundankulu bwa Izaleela paakadiswikaye ne maalu a pa buloba mulekele bya Nyuma mwangate bya cidîidi. Divwa dîbà mundankulu ku Nicée paakenza ekeleeziya cintu cimwecimwe aci. Ndîbà dya mundankulu mpindyewu dikaadi ekeleeziya idisanga edi.

Mpindyewu Aakaba paakaselaye Izabela ke kumupaye dyanyisha dya kwangataye mfranga ya ditunga bwa kwibakaye nzubu ibidi minenaanenaale ya dikuukwilamu Ashtarté ne Baala. Nzubu wâkaashilabò Baala uvwa bunene bukumbane bwa Izaleela yônsò musanga ntete kulwa kukuukwilamu. Nenku paakabwela Constantin ne ekeleeziya mu dibaka mpaakapaye ekeleeziya nzubu, ne wakateekamu byaltar ne bimfwanyi, ne wakalongolola dilondangana dya myânzù dikaavwà dibange kwangata mmwenekelu.

Paakapetela Izabela bukookeshi bwa ditunga paanyima pende ke yêyè kubweja bantu ku bukole mu ntendeleelu wende yêyè ne kushipaye bapofeta ne baikwidi baa Nzambi. Byakanyanguka bikole be mu mushindu wa kufikisha Eliya, mutumiibwe wa dituku adi, ku dyela meeji ne yêyè ke umwepele ukaavwa mushaale; kadi Nzambi

uvwa ne bakwabo 7.000 bavwa kabayi batwile Baala binu to. Ne mpindyewu mene ewu munkaci mwa mangumba a Ba-Baptistes mwamwa, ne Ba-Méthodistes, ne Ba-Presbytériens, ne bakwabo, mudi bamwe biikala mwa kupatuka ne kwalukila kudi Nzambi. Ndi muswe numanye ne mêmè ewu, mpindyewu, nцитuku ndwisha bantu ne ncyadyakubalwishaku to. Dingumba — ndongolwelu mene wa bulongolodi, ke ûntû mêmè ndwisha. Bikengela anu mmulwishe, bwalu yêyè ke utu Nzambi mukine.

Mpindyewu twänji twimanaayi ndambu mwaba ewu bwa twambulule maalu atudi bapatule pa bidi bitangila dikuukwila dya mu Twatila. Mvwa mwambe ne bavwa bakuukwila Apollo (uvwa nzambi-dîbà) pamwe ne mukalenge wabo. Mpindyewu Apollo mwine ewu bavwa bamubiikila ne ‘mupangishi wa makenga.’ Yêyè uvwa wipata makenga uasaka kule ne bantu. Yêyè nguvwa ubabenesha ne mwikale udileeja mwîmpè kudibo. Yêyè nguvwa ne cya kwikala ulongesha bantu. Uvwa ufila dyumvwija dya maalu avwa atangila dikuukwila, ne mikiiya ya mu ntempelo, midimu ya dyenzela nzambi miine ayi, maalu avwa atangila milambu ya mashi ne lufu ne mwoyi wa paanyima paa lufu. Mushindu uvwaye wenza biine ebi mwikale ubyenzela kudi muprofeta mukaji uvwa usòmba pa nkwaswa wa mikolo isatu mwikale utuuka mikishi. Ekelekele! Nudi numona bwalu abu anyi? S’ke yêyè mwine muprofeta mukaji Izabela udi mwikale ulongesha bantu ewu. Ne diine dilongesha dyende adi diikàle diseeswisha basadidi baa Nzambi ne dibendesha masandi. Mpindyewu masandi adi umvwija ne ‘dikuukwila dya mpingu.’ Ke cyôcì aci dyumvwija dyawu mu nyuma. Ndibaka didi kadiyi dyanyishiibwe to. Dibaka dya Aakaba ne dibaka dya Constantin avwa ônsò abidi kâyi maanyishiibwe nansha. Bônsò babidi bavwa benda masandi a mu nyuma. Ngendaamasandi yônsò ewu neakuupuke anu mu dijiba dya kapyà. Nzambi ngudi mucyâmbè.

Mpindyewu pashiishe, dilongesha diine dya Ekeleeziya wa Katolike (ekeleeziya ncintu cikaji, mmukaji) didi dibengangana ne Dîyî dya Nzambi. Paapà udi yêyè Apollo mwena diinà mu nkudimwinu wa cyena leelu ke udi mulongeshe bantu bwa kulamakanganabo ne mpingu. Ekeleeziya wa cyena Loomo ke ukaadi mushaale mpindyewu muprofa mukaji wa mashimi kudi bantu bwalu mmuumushe Dîyî dya Mukalenge kudi bantu kadi kufila meeji ende yêyè pa bidi bitangila difwilangana dya luse ku mpekaatu, citu citwala mabenesha a kudi Nzambi; ne bansaserdose mbaye kule bakafike too ne ku dyamba kabiyi bya ditontolola ne bôbò mbadi ne bukookeshi kabiyi anu pa mwoyi to kadi ne pa lufu. Badi balongesha bya mu bôbò ne kudi mpurgatoriyo, cyûdi kuyi mwa kupetaku kaaba nansha kamwe mu Bible to. Badi balongesha ne masambila ne misà ne mfranga nebikupatule mwine mu mpurgatoriyo amu bikubweje mu dyulu. Awu ndongolwelu mu kaabujima udi mwikale mwashila pa dilongesha dyende ngwa mafi. Kî mmwashila pa bishimikidi bishindame bya dibuulula dya Nzambi mu Dîyî Dyende to, kadi mmwashila pa lunteka ludi luvwanduluka, lwa mashimi a dyabulu anu pa ôwò.

Ekeleeziya wakuumuka buludi ku bulongolodi e kuya ku dingumba ne kubangila anu apu too ne ku dilongesha dya mashimi. Mmwômò. Beena Katolike wa cyena Loomo kabatu biitabuujà ne Nzambi udi mu Dîyî Dyende nansha. To, mukalenge. Bu bôbò biitabuuje's bavwa ne cya kunyingalala ne kwalukila cyanyima, kadi bôbò badi bamba ne Nzambi udi mu ekeleeziya Wende. Aci's ncifwanyine kuvwija Bible bu ne mmaalulu malonda a Ekeleeziya wa Katolike. Kabyena nanku nansha. Anji monaayi anu cyakenzabo anu bwa dibatiiza dya mu mâyi edi cyanaana. Bôbò kudyumusha kadiciyi kabidi Dibatiiza dya cyena Kilisto to kadi kudivwija dya cimpangaanu cya myânzù. Anyishaayi nnulondele dilabula dîmvwà mwenze ne nsaserdose mukwabo wa cyena Katolike. Mwânà wa bakaji mukwabo ûngààkabàtiizà cikondo kampanda kushintulukaye e kushaala Mwena Katolike, nenku ke nsaserdose awu kujingaye

bwa kungela nkonko pa bivwa bitangila mwine nsongakaji awu. Yêyè kunkonka ne ndibatiiza kaayi dyakangataye. Mêmè kumwambila ne mvwa mumubatiize mu Dibatiiza dya cyena Kilisto ditu dya mushindu anu umwepele uvwaku bwa ku dyanyi dimanya. Mvwa mumujiike mu mâyi mu Dînâ dya Mukalenge Yesu Kilisto. Nsaserdose awu kundeejaye ne musangu kampanda ke civwa Ekeleeziya wa Katolike wenza. Anu mwaba awu ke mêmè kumukonka ne ncikondo kaayi ciine aci civwa Ekeleeziya wa Katolike ucyenza, bwalu mêmè ntu nkaadi mubalebale mikanda yabo ya maalu malonda nciyiku mwa kusangana civwaye yêyè wamba aci to. Yêyè kungambila ne civwa cisanganyiibwa mu Bible, ne Yesu mwine ke wâkalongolola Ekeleeziya wa Katolike. Mêmè kumukonka ne uvwa wela meeji ne Peetelo ke uvwa bushuwa menemene paapà wa kumpala. Ke kwambaye ne dishindika dyônsò ne uvwa m'Peetelo. Mêmè kumukonka ne citubo bafukila misà mu Latin nê mbwa kwikalabo batwishiibwe ne ivwa mu yôyi ne kayivwaku mwa kushintuluka anyi? Yêyè kwamba ne mbulelela. Ke mêmè kumwambila ne bakaavwa balaluke bikole baye kule ne civwabo naaci kuntwadijilu. Mêmè kumuleeja ne bu Ekeleeziya wa Katolike mwikale bushuwa menemene witabuuja Mukanda wa Byenzedi, nenku mêmè ke uvwa Mwena Katolike wa mushindu wa cyena kale. Yêyè kungambila ne Bible uvwa mifundu ya maalu malonda a Ekeleeziya wa Katolike ne kabidi Nzambi uvwa mu ekeleeziya. Mêmè kubenga cyende bwalu Nzambi utu mu Dîyi Dyende. Nzambi ikale mulelela kadi muntu yônsò ikale mwena mashimi. Wêwè muumushile anyi musakidile ku Mukanda awu, Nzambi mmulaye ne neasakidile bipupu kudi aba badi basakidila ne neuumushile cyabo citupa ku Mukanda wa Mwoyi bôbò badidinge buumushileku kantu. Bwakabuulwibwa 22.18,19.

Anyishaayi ndeeje naka mushindu udi Ekeleeziya wa Katolike wa cyena Loomo witabuuja ne Nzambi udi mu ekeleeziya pamutu paa kwikalaye mu Dîyi. Mèyi ngôwò aa mangata mu mukanda wa maalu a ku dituku ne ku dituku a

Paapà Jean 23. “Dilabula dyanyi dya bidimu ebi bisatu bîndi mwikale Paapà, kacya ngîkala ‘mu diciina ne dizakala,’ bîndi mwitabe mudimu ewu mu ditumikila dikezuke *dya Diswa dya Mukalenge, udibo bampe kudi Nsangilu Munsantu wa Ba-Kardinale mu cisangilu cyabo*, didi difila bujaadiki ku cikemu eci, ne didi kabingila kadi kashintuluka ne kalaala matuku àbûngî bwa mêmè kwikala ne lulamatu ku dyôdî; dyeyemena dijima kudi Nzambi, mu byônsò bidi bitangila matuku adi panshi aa, ne dipolobela dipwangane pa bidi bitangila matuku acivwavwa.” Paapà ewu udi wamba ne Nzambi mmwakwile kudi ekeleeziya bwa kubuulula diswa Dyende. Mashimi a dikema. Nzambi utu mu Dîyî Dyende ne utu wakwila ku Dîyî mwikale ubuulula diswa Dyende. Yêyè kwamba kabidi ne uvwa muteeke dyeyemena dyende dijima mu dîyî dya bantu ne pa nanku uvwa uditumikila mu dipolobela. Aci cidî cimweka cîmpè be kadi mmashimi ebe a dikema. Anu bu dikudimika dya maalu mu Budimi bwa Edena.

Mpindyewu tuyaayi mu Bwakabuulwibwa 17 emu bwa tumone mukaji ewu, ekeleeziya awu, udi ne mwoyi ku biprofeta bya mafi kakuyi ku Dîyî dya Nzambi to. Mu mvense 1 Nzambi udi umubiikila ne ndumba munene. Nndumba bwa cinyi? Bwalu udi wenda masandi. Mmukwate bantu kadi kubeela mu cintu cimwecimwe aci. Bwanga bwa masandi ncinyi? Dîyî dya Nzambi. Pa nanku mukaji ewu nndumba bwalu mmuumuke ku Dîyî. Ke yêyè awu musombe pa mâyî àbûngî, adi umvwija misumba ya bantu. Eci bushuwa cidî ne cya kwikala anu ekeleeziya wa mashimi bwalu ekeleeziya wa Nzambi utu mukese — nekwikale anu bakese menemene baamupeta.

Tangilaayi numone ne udi bu cinyi ku mèsù kwa Nzambi, nansha mudiye umweka wa bakema kudi bantu ne mudiye umweka mutalale maalu amu. Mmukwacike bukooya bwa masandi ende. Uvwa mukwacike mashi a bavwa bafwile diitabuujâ. Anu menemene bu Izabela wâkashipa baprofeta ne baakwidi ne wâkabûtula bantu baa Nzambi bavwa kabayi

baswe kwina mina Baala ne kumukuukwila. Nenu's ke cyôci aci menemene cyakenza Ekeleziya wa Katolike. Baakashipa bônso bavwa kabayi baswe kwina mina bulombodi bwa paapà. Aba baakajinga Dîyi dya Nzambi pamutu paa mêyi a bantu baakabashipa, nangananga mu mishindu ya cikisu. Kadi mwine ekeleziya uvwa ende maalu mwikale uenza anu ne lufu ewu, yêyê mwine's uvwa mufwe kadi kayi mumanye nansha. Munda mwende kamuvwaku mwoyi nansha mukese ne kakuvwaku bimanyinu bimushindikija to.

CIPOOLO BWA KUNYINGALALAYE

Bwakabuulwibwa 2.21: "Nenu ndi mumupe cipoolo bwa kunyingalalaye ku masandi ende; kadi kî mmunyingalalale nansha." Nutu bamanyeku ne ekeleziya mwine ewu uvwa ne lwonji lupite lwa Aakaba anyi? Nutu bamanyeku ne yêyê ewu wakanyingalalaku ndambu wa dibà ne wakenda bitekete bitekete kumpala kwa Nzambi anyi? Kamwena mushindu wa kwamba cyôci aci bwa Ekeleziya wa Katolike wa cyena Loomo nansha. To, mukalenge. Katu mwanji kunyingalalaku to, kadi yêyê wakakolesha mutu wenda anu ubutula muntu yônso ne aba bônso bavwa bateeta kumupa dikwacisha bwa kunyingalalaye. Maalu malonda ke ôwò awu. Mpindyewu Nzambi kaakutungunuka ne kajuula anu baamusanjeela mu cikondo cyônso to kadi Wakajuula bamwe bakwacishi baa dikema baa biine baamusanjeela abo. Wakapa cikondo ne cikondo cyônso bantu baa Nzambi baa dikema ne bôbô aba baakenza byônso bivwabo paabo mwa kwenza abi bwa kwaluja ekeleziya kudi Nzambi. Ncya bushuwa ne Nzambi wakamupa mpunga ne dikwacisha bwa kunyingalalaye. Yêyê wakanyingalalale ne wakaleejaku ku mamuma ende bwa ne mmunyingalalale anyi? To, mukalenge. Yêyê katu mwanji kunyingalalaleku ne kaadyakunyingalalaku to. Yêyê mmukwacike. Ukaadi mujimije byumvwilu byende mu maalu a Nyuma.

Mpindyewu kanwikadi nwâvwa kubwejakaja maalu bwa kubanga kwela meeji ne Ekeleziya wa Loomo ukaadiku

munyingalale ku dishipa dyende dya bansantu bwalu udi munkaci mwa kuteeta kudisanga ne Beena Mishòònyì mwikale wenza mushindu wa ne twitabaayi yende ikumbanangane ne Twitabaayi ya Mishòònyì. Kacyapu musangu wende nansha umwe katuku mwanji kulomba luse wambaku ne mmupiile bwa bantu batuye mushipe midita ne midita abo to. Ne yêyè mwine kaadyakucyenzaku to. Nansha mene mudiye umweka mutalale maalu ne mwikale mupole mu cikondo eci sungasunga, kadi neajuukuluke bwa kushipangana, bwalu dishipangana dyôdì ke ditu dituule dipuwe mu wende mwoyi mubi utu kawuyi kanyinganyinga awu.

CIBAWU CIKOSELA NDUMBA AWU

Bwakabuulwibwa 2.22-23: “Mona, nêmmukùpè mu bulaalu, ne bônso badi benda nende masandi mu dikenga dikole, amba anu bôbò banyingalale ku byenzedi byabo. Ne nêshipè bânà bende ne lufu; ne ekeleeziya yônso neimanye ne Mêmè ke Utu ukenketa twonyi ne myoyi, ne nêpe muntu ne muntu wa kunudi bilondeshile midimu yenu.”

Cinyi? Mukaji ewu udi ne bânà? Ne yêyè mwine nndumba? Piikala bwalu budi ne yêyè ukaavwa mupete bânà ku midimu ya bundumba bwende, nanku budiye naabu's mbwa kwoshiibwaye mu kapyà bu mudi Dîyì dyambe. Aci ke bulelela bwa menemene. Ke wende ndekeelu bwalu yêyè neoshiibwe mu kapyà. Wende ndekeelu ndijiba dya kapyà. Kadi imanaayi twânjì kwelabi meeji ndambu bwa biine bânà aba. Mukaji ke mwena munda mudi bânà bapatukila. Mbimweneke ne mukaji ewu uvwa ne bânà bavwa bapatuke munda mwende kadi mbenze cintu cimwecimwe cyakenzaye pende. Ndeejaaayi tũng ekeleeziya nansha umwepele ukaadiku mupatuke mu bulongolodi kayi mumupingane buludi. Kênàku nansha. Nansha umwe. Ba-Luthériens baakapatuka kadi pashiishe kudyzenzabo cyakabidi bulongolodi ne leelu wa Ndaaya ewu bakaadi badibwinkemu pamwe ne nkwaka ewu wa bukwântèndeleelelu. Ba-Méthodistes baakapatuka e kudyzenzabo

cyakabidi bulongolodi. Beena Mpenta baakapatuka e kudyenza cyakabidi bulongolodi. Nekwikale dipatuka dikwabo, nenku Nzambi atumbe bwalu bôbò kabaakudyenza kabidi bulongolodi to bwalu mbamanye bulelela. Awu musumba ke wikala mukaji musela wa dituku dya ndekeelu.

Mpindyewu mbambe mwaba ewu ne ndumba mwine ewu uvwa ne bânà. Mpindyewu bôbò aba bavwa mbanganyi? Bavwa bânà baa bakaji, bwalu bavwa ekeleeziya anu bu yêyè. Mpindyewu bwalu bunene budi bukoka ntema yâbûngî mbwebu. Izabela ne Aakaba baakalela mwânà wa bakaji. Mwânà wa bakaji awu kusediibwaye kudi Yeholama mwânà wa balume wa Yehoshafata, nenku mu Bakalenge Mwibîdî 8.16 badi bambamu ne “Yeholama wakenda mu njila ya tatwëndè-mwenu.” Wakabwela buludi mu dikuukwila dya mpingu ku dibaka diine edi. Yêyè wakabweja mu dikuukwila dya mpingu Yuda uvwa uciina Nzambi ne ukuukwila Nzambi awu. Aci’s ke cyôcî menemene cidibo benze kudi ekeleeziya yônsò idi miikale bânà baa bakaji eyi, anu mûngânûleejîbu. Badi babanga mu bulelela kadi bakabwela dibaka pa kuditwa mu bulongolodi ne balekela Dîyî bwa kwangata bilele, twitabaayi ne bikwabo. Mpindyewu anyishaayi ngumvwije bwalu ebu. Mu Ebelu 13.7 mbambemu ne: “Tumikilaayi aba badi banukookesha, baakanwambila Dîyî dya Nzambi.” Dîyî ke didi ditukookesha, kî mbantu nansha. Mpindyewu mulume yêyè bu bay’a mukaji udi mutu wa mukaji awu. Yêyè ngudi umukookesha. Kadi ekeleeziya pende, s’mmukaji, ne mukookeshi wende’s n’Dîyî. Yesu ke udi Dîyî. Yêyè mubenge Dîyî mwangate bukookeshi bukwabo kampanda wênjî ngendaamasandi. Mpindyewu nteelelaayiku ekeleeziya nansha umwepele utu kayi mulekele Dîyî kwangata bilele ne twitabaayi. Yônsò idi ngendaamasandi – mudi maamu, mmudi mwânà wa bakaji.

Dinyooka dya ndumba awu ne bânà bende nediikale cinyi? Ee, nediikale pabidi. Cya kumpalampala Yêyè mmwambe ne:

“Nêmmukupè mu bulaalu.” Bilondeshile citupa cya ndekeelu cya mvense wa 22, neciikale bulaalu bwa dikenga, anyi dikenga dikole. Cyôci menemene aci ncidi Yesu mwambe mu Maataayi 25.1-13. Kuvwa nsongakaji virgo dikumi. Itaanu ivwa ne lungenyi ne itaanu ivwa mikutakane. Itaanu ya lungenyi ayi ivwa ne maanyi (Nyuma Mwîmpè) kadi itaanu mikwabo kayivwa naawu to. Paakeediibwa lubila ne: “Monaayi, Mubaki nyawu ulwa,” byakakengela ne itaanu mikutakane ayi inyeeme lubilu yenda ikebangana ne maanyi paakabwela nsongakaji virgo itaanu ya lungenyi eyi bwa dibaka. Itaanu yakashaala pambelu ayi yakashaala bwa dikenga dikole. Ke cyenzekela aba bônso biikala kabayi baya mu dyambwibwa. Ke cyalwa kudikuma pa ndumba awu ne bânà bende baa bakaji. Ciibîdi, mbambemu ne Yêyè neabashipe ne lufu anyi mudi nkudimwinu wa ku mwaku ne ku mwaku wamba ne: “Bashipiibwe ne lufu.” Edi dîyî’s didi dikemesha. Tudi bafwanyine kwamba ne: “Muntu ashipiibwe biikale bamwowe ku mwonji, anyi ku nkwaswa wa nzembu anyi mushindu kaayi mukwabo.” Kadi eci cidu cyamba ne: “Bashipiibwe ne lufu.” Lufu lwôlò lwine ke ludi lukebe lufu lwabo bôbò. Mpindyewu ndi muswe bwa nwênù kumona bitooke tòò bwa mmone mwa kwangatulula cimfwanyi cyetu cya mwânà wa bakaji wa Izabela mwikale usediibwa mu nzubu wa Yuda ne pa nanku mwikale umubweja mu dikuukwila dya mpingu ne ufikisha Nzambi ku difila Yuda ku lufu. Ke cyakenza Baalama, yêyè pende. Pa nanku ke Izabela ewu ne bumpangaanu bwende. Ke Yuda wawa mwikale ukuukwila Nzambi mu mushindu mukumbanangane ne mwikale usomba nsombelu wa Dîyî. Nenku Izabela udi uselesha mwanende kudi Yeholama. Mu kasunsa mene kadi cyôci aci cyenzeka, Yeholama udi ufikisha bantu ku diikala bakuukwidi baa mpingu. Mu kasunsa mene mwakenzeka dibaka adi ke mwakafwa Yuda. Lufu lwa mu nyuma lwakabwela. Mu kasunsa mene mwàkadyënzà ekeleeziya wa kumpala wa Loomo bulongolodi, ke dyakafwaye. Mu kasunsa mene mwàkadyënzà Ba-Luthériens bulongolodi, lufu lwakabwela ne baakafwa. Beena Mpenta baakalwa

paabo baa ndekeelu e kudiyenzabo bulongolodi. Nyuma kuumukaye, nansha mudibo kabayi biitaba ciine aci. Kadi Yêye wakuumuka. Dibaka adi dyakatwala lufu. Pashiishe ke bukênkê bwa Bwobumwe bwa Bunzambi kulwabu. Bôbò kudiyenza bulongolodi ne kufwabo paabo. Pashiishe paanyima paa kapya kaa Nzambi kamane kupona pa Musulu wa Ohio mu cidimu cya 1933 ke ditabuluja dya dyondopa kupaasalala pa buloba bujima, kadi kadiyiku dipicile mu bulongolodi kampanda nansha. Ke Nzambi kupatukaye kuya pambelu paa bisumbu bya cyena Mpenta, pambelu paa bulongolodi, ne cyenzaYe mu matuku acivwavwa neciikale pambelu paa bulongolodi, cyôci paaci. Nzambi kêna mwa kukwacila mudimu kudi bantu bafwe to. Udi mwa kukwacila mudimu anu kudi bidimba BIDI NE MWOYI. Bidimba bidi ne mwoyi abi bidi pambelu paa Baabulona.

Pa nanku nudi numona, “Lufu” anyi “Bulongolodi” kulwalu, nenku ekeleeziya kufwaye, anyi bwa kutamba kutookesha bwalu abu menemene, lufu ke kulwalu kusombela mwaba mene uvwa anu MWOYI mukookeshe bwa katupa kîpî. Anu mwakatwadila Eva bukwabantu lufu ku cibangidilu ke mudi bulongolodi mpindyewu butwale lufu, bwalu bulongolodi ncipeta cifumine kudi banyangakaji babidi: cyena Nikalao ne cyena Baalama, babutampakaje kudi muprofeta mukaji Izabela. Mpindyewu bivwa bikengela Eva kwikalaye mwoshiibwe pamwe ne nyoka bwa cyenzi cyabo cya kanyawu aci. Kadi Adama wakadyela pankaci, kumwangataye lukasalukasa ku luseke lwende mu mushindu wa ne yêye wakasungidiibwa. Kadi piikala ntendelelu ewu wa Sataana mwenze lwendu lwende lwônso nkòong lwa bikondo, kakwakwikalaku muntu nansha umwepele bwa kudiyela pankaci nansha, ne yêye neoshiibwe pamwe ne museeswishi wende awu, bwalu ndumba awu ne bânà bende ne mufwilakanyi ne Kilisto ne Sataana bwônso bwabo nebakapete myaba yabo mu dijiba dya kapya.

Anu mwaba mwine ewu nêmpitè nye kumpala ne pâmwâpa bivwa bikengela kulaminyina cyôci eci bwa diyiisha dya pa cikondo cya ndekeelu, kadi mbimweneke anu

bu ne mbikumbane bwa kucyelamu mpindyewu bwalu cidu cyakula bwa bulongolodi mu mushindu mutooke menemene ne cyènzekelàmu. Nenku ndi muswe bwa kunudimwija. Bwakabuulwibwa 13.1-18: “Nenku mvwa mwimane pa lusenga lwa ku mbû, nenku mêmè kumona nyama wa lwonji ujuuka upatukila mu mbû, mwikale ne mitu mwandamutekete ne nsengu dikumi, ne pa nsengu yende ayi piikale bifulu bya butumbi dikumi, ne pa mitu yende ayi piikale dînà dya kupenda naadi Nzambi. Nenku nyama wa lwonji ûngààkamònà awu uvwa mufwanangane ne nkashaama, ne makama ende avwa menze bu makama a ours, ne mukana mwende mwenze bu mukana mwa ntambwe; nenku dragon kumupaye bukole bwende, ne nkwasu wende ne bukookeshi bunene. Nenku mêmè kumona umwe wa ku mitu yende mwenze bu bawutape mputa wa lufu; ne mputa wende wa lufu awu kuumaye: ne baa pa buloba bônso baakakemangana bwa nyama wa lwonji awu. Ne baakakuukwila dragon wâkapà nyama wa lwonji awu bukole: nenku baakakuukwila nyama wa lwonji awu, bamba ne: Udi bu nyama wa lwonji nnganyi? Udi ne bukole bwa kumulwisha mvita nnganyi? Nenku baakamupa mukana muvwa mwakula maalû manene ne bipendu bya upenda Nzambi; ne baakamupa bukole bwa kutungunukaye ngondo makumi anaayi ne ibidi. Nenku yêyè kutubula mukana bwa kupenda Nzambi, bwa kupendaye dînà Dyende, ne tabernacle Wende, ne aba badi basombebe mu Dyulu. Nenku baakamupa bukookeshi bwa kulwisha bansantu mvita, ne bwa kubacimunaye: ne baakamupa bukookeshi kumutu kwa bisamba byônso, ne myakulu yônso, ne matunga ônsò. Nenku aba bônso badi basombebe pa buloba nebamukuukwile, aba beena mênà adi kâyi mafundiibwe mu Mukanda wa Mwoyi wa Mwânà wa Mukooko wâkashipiibwa anu ku cifukidi mene cya dyulu ne buloba. Muntu yêyè ne maci, ûmvwè. Ewu udi ufilangana mu bupika neaye mu bupika: ewu udi ushipangana ne mwele wa nkânzà neikale ne cya kushipiibwa ne mwele wa nkânzà. Apa ke padi lutuulu

ne diitabuuja bya bansantu. Nenku mêmè kumona nyama mukwabo ubanda upatuka mu buloba; ne uvwa ne nsengu ibidi mifwanangane ne ya mwânà wa mukooko, ne wakaakula bu dragon. Ne yêyè udi wenza bukookeshi bwônsò bwa nyama wa kumpala awu kumpala kwende, ne udi wenza ne buloba ne aba badi basombele pa buloba bakuukwile nyama wa kumpala awu, mwena mputa wa lufu wâkuuma awu. Ne yêyè udi wenza maalu a kukema manene, mu mushindu wa ne udi ulokeshya kapyà mu dyulu kamata pa buloba bantu batangile. Ne udi useeswisha aba badi basombele pa buloba ku bishima abi bivwaye ne bukole bwa kwenza nyama wa lwonji mutangile; mwikale wambila aba badi basombele pa buloba ne, bavwa ne cya kwenza cimfwanyi cya nyama wa lwonji, wa bwena wâkatâpiibwa mputa ku mwele wa nkânzà, ne wâkashâàla ne mwoyi awu. Ne yêyè wakapeta bukole bwa kuvwija cimfwanyi cya nyama wa lwonji aci ne mwoyi, bwa cimfwanyi cya nyama wa lwonji aci cyênzè eku cyakula, eku cyenza ne bantu bââbûngî badi kabayi baswe kukuukwila cimfwanyi cya nyama wa lwonji abo babashipe. Nenku yêyè udi wenzeja bônsò, ne bakese ne banene, babanji ne bapele, badishikamine ne bapika, bwa bapete cimanyinu mu cyanza cyabo cya dyabalume, anyi pa mpala: Ne bwa muntu nansha umwe kayi mwa kusumba anyi kusumbisha, pa kuumusha ewu uvwa ne cimanyinu, anyi ne dînà dya nyama wa lwonji, anyi nombwa wa dînà dyende. Apa ke padi lungenyi. Ewu udi ne luumvu ênzè makumi a nombwa wa nyama wa lwonji: bwalu nnomba wa muntu kampanda; ne nombwa wende mwine udi nkama isambombo makumi asambombo ne isambombo.”

Ewu nshapita udi uleeja bukookeshi bwa Ekeleeziya wa Katolike wa cyena Loomo ne cyenzelaye mu bulongolodi. Nwavulukaayi ne ke mvinyo wa mafi nyêyè ewu. Ateele Dînà dya Mukalenge, udi uditeela nanku awu anu mu mashimi. Bukookeshi budi kumutu kwende kî mbwa Mukalenge to kadi mbwa Sataana. Ndekeelu wa byônsò yêyè neadifwanyikije patapata anu ne nyama wa lwonji. Ndumba udi mubande

pa nyama mukunze kunzuu awu udi uleeja mu mushindu musunguluke ne bukole bwende bwine nnzambi wa makolela (Sataana) kayi Nzambi wetu twêtù, Mukalenge Yesu Kilisto to.

Mu mvense wa 17, bidi bileeja ne dishindika dyônsò ne yêyè neapete bukontononyi bwônsò bwa bungendaamushinga bwa buloba bujima, bwalu muntu nansha umwe kêna mwa kusumba anyi kusumbisha padiye kayi mupete dyanyisha dya kudiye nansha. Bwalu ebu budi bupeta dishindika dyabu mu Bwakabuulwibwa 18.9-17 udi uleeja dibwelakana dyende ne bamfumu, baamilopo, bangendaamushinga, bônsò badi babwelakane ne Loomo ne bungendaamushinga.

Mu Bwakabuulwibwa 13.14, tudi tuyiilamu ne nyama wa lwonji udi utangalajila bwenzeji bwende ku cimfwanyi cidibo bamwenzele. Cimfwanyi cidibo benze nnsangilu wa bukwântêndeleeleu wa buloba bujima, mwadisanga ekeleeziya yônsò idi midyënzè bulongolodi pamwe ne Beena Katolike baa cyena Loomo (bôbò biine badi munkaci mwa kucyenza nansha mpindyewu ewu.) Bidi mwa kwenzeka menemene bwa didisanga edi kwenzekadi mu kiipacila kaa kwimanyika bukole bwa communisme. Kadi bu mudibi ne communisme bu Nebukandeneesa mmujuudiibwe bwa kwosha munyinyi wa ndumba awu, Loomo neacimunyiibwe ne neabutudiibwe. Fundaayi nulame bwa ne mwaba wônsò ukaadi ekeleeziya wa cyena Loomo muye, communisme utu ukaadi anu mulondepu. Bikengela biikale mushindu awu. Nenu anyishaayi nnumwije mpindyewu ne, kanwikadi nwâlwa kwela meeki ne communisme ke mwena lukuna umwepele unudi nende nansha. To, mukalenge. Kudi kabidi Ekeleeziya wa Katolike, mupite ne pôpò apu.

Mpindyewu tubalaayi Bwakabuulwibwa 13.1-4, nenku tucifwanyikijaayi ne Bwakabuulwibwa 12.1-5. Bwakabuulwibwa 13.1-4: “Nenu mvwa mwimane pa lusenga lwa ku mbû, nenku mêmè kumona nyama wa lwonji ujuuka upatukila mu mbû, mwikale ne mitu mwandamutekete ne

nsengu dikumi, ne pa nsengu yende ayi piikale bifulu bya butumbi dikumi, ne pa mitu yende ayi piikale dîna dya kupenda naadi Nzambi. Nenku nyama wa lwonji ûngààkamònà awu uvwa mufwanangane ne nkashaama, ne makama ende avwa menze bu makama a ours, ne mukana mwende mwenze bu mukana mwa ntambwe; nenku dragon kumupaye bukole bwende, ne nkwasà wende ne bukookeshi bunene. Nenku mêmè kumona umwe wa ku mitu yende mwenze bu bawutape mputa wa lufu; ne mputa wende wa lufu awu kuumaye: ne baa pa buloba bônso baakakemangana bwa nyama wa lwonji awu. Ne baakakuukwila dragon wâkapà nyama wa lwonji awu bukole: nenku baakakuukwila nyama wa lwonji awu, bamba ne: Udi bu nyama wa lwonji nnganyi? Udi ne bukole bwa kumulwisha mvita nnganyi?” Bwakabuulwibwa 12.1-5: “Nenku kwakamweneka bwalu bwa kukema bunene mu dyulu; mukaji muvwadika dîbà, ne ngondo munshi mwa makàsà ende, ne ku mutu kwende kwikale cifulu cya butumbi ciikale ne mitooto dikumi ne ibidi: Ne yêyè uvwa ne difu mwikale wela mbila, mwikale udinyenga bwa kulela, utata bwa kulelaye. Nenku kumwenekaku bwalu bukwbabo bwa kukema mu dyulu; ne monaayi dragon munene mukunze, mwikale ne mitu mwandamutekete ne nsengu dikumi, ne bifulu bya butumbi mwandamutekete pa mitu yende. Nenku mukila wende wakapulmuna cyabisatu cimwe cya mitooto ya mu dyulu, ne wakayeela pa buloba: ne dragon awu wakiimana kumpala kwa mukaji ukaavwa pabwîpî ne kulela awu, bwa kudyaye mwanende awu anu ucidi ulediibwa. Nenku yêyè kulela mwânà wa balume, uvwa ne cya kukookesha matunga ônsò ne dikombo dya cyamu cifiike: ne mwanende awu wakaangaciibwa mu dyulu mudi Nzambi, ne ku nkwasà Wende wa butumbi.” Sataana ne ntendeleelu wende wa ciiSataana badi mu nyama yônso ibidi eyi. Mu Bwakabuulwibwa 14, nyama wa lwonji wâkatâpiibwa mputa wa lufu kadi kwikalaye kabidi ne mwoyi awu udi Loomo wa bukallenge bwa cimpangaanu wâkapòna ku mvita ya ciputuku yakamwelabo kudi ba-Barbares nenku

yêyè kujimija bukole bwende bwa maalu a munshi mwa dîbà. Kadi wakabupetulula mu Loomo wa buupaapà. Nudi numona bwalu abu anyi? Ditunga dikaavwà dikòòkesha mu divingutula dya kantu ne kantu ne dikaavwa dishaale bukalenge bwa butambe bukole bwa kacya baamanya adi, ndekeelu wa byònsò dyakatapiibwa mputa wa lufu. Bukole bwadi bwakamuumuka pa bidi bitangila maalu a mu mubidi bu mudi dikontonona dya bilwilu ne maalu makwabo. Kadi mu bukookeshi bwa Constantin dyôdi kupetulula mwoyi, bwalu Loomo wa buupaapà mmudifinde mu buloba bujima, ne bukole bwende bukaadi kabuyi bwa dyela mpatà to. Udi ukwata mudimu ne bamfumu ne bangendaamushinga, ne mu makanda ende a lufu mu maalu a ntendelelu ne a dikebulula dya byûmà awu yêyè udi ukookesha bu nzambi mukaji wa cikondo citudi eci. Kabidi yêyè ke mwine dragon awu uvwa mwimane mwikale mwindile bwa kudya mwânà wa balume awu. Helode wakateeta bwa kushipa Mukalenge Yesu kadi kupangilaye. Paanyima Yesu kupoopediibwaye ku nkuruse kudi basalaayi ba cyena Loomo, kadi mpindyewu mwangaciibwe muulu ku nkwaswa wa butumbi.

Mpindyewu pamwe ne bîngâfûmu ku dyamba ebi, vulukaayi cikeena-kumona cya Danye. Citupa cya ndekeelu cya lupingu, bukole bwa ndekeelu buvwa mu makàsà. Ke cyôci aci cyamu cifiike ne diima. Monaayi ne cyamu cifiike m'Bukalenge bwa cyena Loomo. Kadi kabucyena mpindyewu cyamu cifiike anu pa cyôci to. Cikaadi cisambakaja ne diima. Kadi bucidi anuku ne bwikale bwenza maalu mu buloba bujima mu matunga a mungalaata ne a cimbambila cya citambidile. Ekeleeziya wa cyena Loomo ewu udi usanganyiibwa mu ditunga ne ditunga dyònsò. Mmubwelakane mu byònsò abi.

Anyishaayi nnupe kaacintu pa bidi bitangila cyamu cifiike ne diima. Nudi bavuluke paakatuuta Khrushchev cisabaata cyende pa meesa ku O.N.U.? Ee, kuvwa mwaba awu matunga ataanu a kudi dîbà dipatukila ne ataanu a kudi dîbà dibwelela. Khrushchev ke uvwa mwakudi bwa baa kudi Dîbà Dipatukila ne Président Eisenhower pende bwa baa kudi Dîbà Dibwelela. Mu

mwakulu wa cyena Russie, Khrushchev udi uumvwija diima ne Eisenhower pende uumvwija cyamu cifiike. Balombodi banene babidi baa buloba aba, bânà baa nkasa banene babidi baa makàsà a cyamu cifiike ne diima, bavwa basombe batwangane nkundu. Tukaadi kundekeelu kwa cyôci aci mpindyewu ewu.

Mu mvense 4, badi beela lukonko ne: “Udi ne bukole bwa kulwisha nyama wa lwonji mvita nnganyi?” Mpindyewu dibà ditudi edi kudi amwe mênà manene pa buloba. Kudi amwe matunga a bukole, kadi mpindyewu ewu Loomo ke udi ne dîyi dya kwamba. Paapà ngudi ulombola. Ne bukole bwende yêyè nebutambe kudyunda. Kakwena wâmulwisha yêyè mvita to.

Mvense 6: “Nenku yêyè kutubula mukana bwa kupenda Nzambi.” (Balongesha mikenji ya bantu bu ne ke dilongesha, biikale ne mutu mukole, badibandishi, banangi baa masanka, biikale ne cimwenekelu cya difwana dya Nzambi kadi biikale babenga kwitabuuja bukole bwadi.) Wakapenda Dînà dya Nzambi — ushintulula Dînà adi udivwija myânzù ne ubenga bwa kwenza mushindu mukwabo.

Mvense wa 7: “Nenku baakamupa bukookeshi bwa kulwisha bansantu mvita.” Dikengesha — lufu kudi mwena kwitabuuja mulelela ne biine byônsò abi mu Dînà dya Mukalenge anu bwa Dînà dya Nzambi dipendiibwe, bu mudibi mu Russie mwamwa, bwa bidi ntendeleelu wa cyena Katolike mwenze mwômò amu.

Mvense wa 8: “Nenku bônsò badi basombe pa buloba (bônsò beena mênà adi kâyi mafundiibwe mu Mukanda wa Mwoyi wa Mwânà wa Mukooko wâkashipiibwa anu ku cifukidi mene cya dyulu ne buloba) nebamukuukwile.”

Tudi twela Nzambi twasakidila bwalu mikooko yôyi kayaakumuukwilaku nansha. Bantu bônsò nebiikale mwa kuseeswishiibwa pa kuumusha basungula menemene. Kadi bôbò kabaakuseeswishiibwa nansha. Bwalu badi bumvwa dîyi dya Mulami wa mikooko ne badi baMulonda.


Mpindyewu pashiishe, monaayi eci, citudi bateete kunuleeja. Dimiinu edi dya lufu dya bwena dyakabanga mu cikondo cya

kumpala adi — dimiinu edi dya bulongolodi, ndekeelu wa byônsò ndyedi dyakolu dyalu mucu mûkaadi nyunyi yônsò wa bukooya mwibakile diswa. Nansha mudiye ulaka mukana wamba mudiye mufidi wa mwoyi emu, yêyè mmufidi wa lufu. Dyende dimuma NDUFU. Aba badi baabanyangana nende mbafwe. Ndongolwelu wa bukole wa ekeleeziya wa buloba bujima udi udingakaja baa pa buloba ne munda mwende mmudi disungidiibwa dya mubidi ne dya nyuma ewu udi useeswisha ne ubutula misumba ya bantu. Yêyè kêna anu lufu lwangate mubidi wa buntu nansha, kadi mukuku cidyabibole yêyè mwine ewu neashipiibwe ne lufu ludi lwikale dijiba dya kapyà. Kaa, bu bantu mwa kujingululaku ciikala wabo ndekeelu pa kushaala munda mwende's we. "Patukaayi munda mwende, nudi baswe kufwa bwa cinyi?"

DIDIMWIJA DYA NDEKEELU

Bwakabuulwibwa 2.23: "Nenku Mêmè nênshipè bânà bende ne lufu: nenku ekeleeziya yônsò neimanye ne Mêmè ke udi ukenketa twonyi ne myoyi."

Nzambi utu utangila mu mwoyi. Aci kacituku cyanji kushintuluka nansha. Ne kacadyakushintulukaku to. Mwaba ewu, anu bu mu bikondo byônsò eku ne eku kudi bisumbu bibidi, byônsò bibidi biikale byamba patooke mudi dibuulula dyabo diikale dya kudi Nzambi ne malanda adibo naawu ne Nzambi. "Nansha nanku bishimikidi bya Nzambi mbiimane bishindame, biikale ne citampi eci ne: *Mukalenge mmumanye badi Bende.*" Timote Mwibîdi 2.19. "Mukalenge ke utu ukenketa twonyi." Mwaku ewu "kukenketa" udi uumwija "kulonda mupwa" anyi "kulondakaja." Nzambi utu ulondakaja ukwata meeji (twonyi) etu; Yêyè mmumanye bidi mu myoyi yetu. Utu umona byenzedi byetu bidi dimwenesha dya bushuwa dya bidi bisanganyiibwa munda mwetu. Mu mwoyi mmudi mufuma anyi bwakane anyi lwonji. Tubingila twetu, twipacila twetu — byônsò mbimanya kudiYe bu mudiYe utangila umona cyenzedi cyônsò. Nenku cyenzedi cyônsò, dîyî dyônsò nebabifikishe

ku cilumbu patwikala ne cya kwandamuna bwa nsombelu yetu. Kakuvwa diciina dya Nzambi nansha dikese to kudi mvinyo wa mafi ne bôbô biine nebayoobe. Aba bônso badi bateela Dînà Dyende, biikalè ne nsombelu mukumbanangane ne wa bansantu. Tudi bafwanyine kudingakaja bantu kadi katwakudingakajaku Mukalenge to. 

Diyiisha edi dya Mwaneetu William Marrion Branham, ne dînà ne, Mukaji Awu Izabela, ndyangata mu Cikondo Cya Ekeleeziya Wa Twatila, mu nshapita wa mukanda wende udi ne dînà ne, Dilongesha Pa Bikondo Mwandamutekete Bya Ekeleeziya, ne ndituuta nunku ewu ku cyamu mu kaabujima kaadi ne dyabanya kudi Voice Of God Recordings.

CILUBA

©2015 VGR, ALL RIGHTS RESERVED

Mayiisha a ku cikwacidi a Mwaneetu William Marrion Branham atu makwata pa mikaba ya mēyi, miikale bûngi bupite pa 1.100 adi mwa kupeteka. Mikaba ya mēyi, CD, mikanda, mikaba ya bindidimbi, fôtô, ne mamanyisha makwabo adi mwa kwambulwisha pa bidi bitangila mudimu wende wa bwambi wa buloba bujima bidi mwa kupeteka kudi:

VOICE OF GOD RECORDINGS

P.O. Box 950, Jeffersonville, Indiana 47131 U.S.A.

www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwîlà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org